

بِسْمِ اللَّهِ الرَّحْمَنِ الرَّحِيمِ

DISCOURS DE

HAZRAT UMMUL MUMINEEN SADR SAHIBA

Faxli Amana Varsally

14 Août 2016

(10 Dhul-Qaddah 1437 AH)

Après ki li fine salué tous bane Siraj Makîn ki présents pour le Ijtema par la salutation de paix dans l'islam, Hazrat Ummul Mumineen Sadr Sahiba fine lire Tashahhud et Ta'uz ainsi ki Surah Al-Fatiha, et li fine ensuite axé so discours lor :

VALEUR DE NOUS HIJAB

Aujourd'hui nous pé trouver ki le *Hijâb* de la femme musulmane fine vine ene proie de bane dimounes ki trouve l'islam comme ene la religion terroriste. Le *Hijâb* islamique en li-même pas zis veut dire sa boute la toile avec quoi nous couvert nous la tête, mais li aussi englobe l'habit entier ki couvert nous la poitrine et nous intimité dans ene façon ki protège nous dignité en tant ki femmes et comme ene marque de nous l'obéissance envers bane commandements d'Allah et de So Messager Hadhrat Muhammad (saw).

Allah dire dans Quran-e-Majeed :

« Ô Prophète! Dire à to bane femmes, à to bane ti filles et femmes bane croyants ki zot baisse lor zot, zot grand robe. Coumsa, dimounes va reconnaite plus vite (ki zot bane musulmanes) et pas va tracasse zot. Allah pardonner et gracier. » (Al-Ahzab 33: 60).

Azordi ki nous pé trouver ? Nous trouver ki bane madames et filles ki habille style western, sans aucaine pudeur pé gagne plisse valeur dans la société mondiale ki bane madames et filles ki habille zot avec chasteté. Dans zot l'élan pou blâme l'islam pou tout malheur ki pé frappe le monde de nos jours, bane ignorants et même bane dimounes dans l'arène politiques dans bane pays du monde pé cherche pou stigmatise la femme musulmane et empêche li pou jouir de so droit pou préserve so dignité et so l'honneur en tant ki femme

respectable dans la société. Azordi li népli pé trouve li en sécurité n'importe kot sa li passer. Bane dimounes pé pli moque de li dans ene façon bien méprisable, sans aucaine respé. Zot oublier ki dans zot l'enseignement aussi fine dire zot ki bizin respé bane madames et ki bane madames bizin préserve zot chasteté. Zot oublier chasteté de celle ki zot adoré couma ene divinité, couma maman de Jésus, Marie (*Maryam*).

Marie ti ene femme extrêmement chaste et so l'habillement ti ene l'habillement tout à fait islamique. Bane Chrétiens dire ki zot ena beaucoup l'amour et respé pour la Vierge Marie, mais alor ki faire kan ene Chrétien trouve ene madame musulmane ki fine habille li exactement couma la Vierge Marie ti pé habiller, kifer sa Chrétien là sans aucaine permission, sans aucaine pudeur rasse so voile, so *Hijâb* kan sa madame musulmane là pé voyager dans avion ? Ki faire sa kalité missié là trouvé ki li pas catholique pour ene musulmane pou habille couma la vierge Marie ti pé habillé ?

Allah dire dans Quran :

« Et celle (la vierge Marie) ki ti préserve so chasteté! Nous ti insuffler en li ene souffle (de vie) ki vine de Nous et Nous fine fer de li ainsi ki so garçon, ene signe pour l'univers. » (Al-Anbiya 21: 92)

Ena bane missié zot tellement fine vine sous l'influence de bane Satans de sa le monde là ki zot fer bane l'enseignements vitale de zot religion vine couma ene marionnette dans zot la vie : n'importe ki l'heure zot envie, zot change sa bane l'enseignements pou satisfaire zot bane désires de sa la terre là !

Hazrat Anas (ra) fine rapporté ki Hadhrat Muhammad (saw) fine dire : « *L'absence de la pudeur dans ene dimoune fer li vine vilain* ». Azordi sa même l'absence de pudeur pé faire bane dimounes dans le monde en entier vine bien vilain. La pudeur li ene trésor ki bizin conne préservé. Celui ki ena pudeur, bé Bondié (Allah) pou avec li. C'est Bondié même ki pou protège li.

De nos jours, la femme musulmane avec so *Hijâb* fine vine couma ene interdit dans la société. Interdiction à bane madames pou porte le voile. Interdiction à bane madames pou préserve zot chasteté. Ki été sa ? Dans ki bassesse zot fine rentré.

Alors, le voile islamique li pas ene innovation de l'Islam. Tous bane religions d'Allah bien avant l'Islam ti encourage bane madames pou couvert zot bien et pou préserve zot dans zot voile et c'est sa ki montrer nous ki tous sa bane la religions là astaire fine subir bane altérations (changements) et zot fine perdi la nature même de raison-d'être.

Nous constate sa dans façon décent ki bane ma-sœurs habiller dans la Chrétieneté de par le monde, ki li dans bane pays islamiques et dans bane pays occidentales et nous trouve sa aussi dans façon ki bane bons madames Chrétiens habille zot kan zot alle l'église kot zot aussi zot porte le voile et couvert zot la tête dans ene façon décent. Sa tamtam ki bane pays de l'Ouest pé faire pou fer bane madames musulmanes retire so voile li en d'autres mots ene désaveu de tous bane bons l'enseignements de Dieu prend dépi Abraham, Moïse, Jésus (as) ziska la religion pure de l'Islam.

Mais nous bane madames et filles musulmanes faudé pas nous baisse nous lébras. Nous bizin déboute pour nous droit ki Allah et So Rassool Hadhrat Muhammad (saw) fine donne nous. Nous *Hijâb* c'est nous protection dans nous bane dealings avec le monde extérieur. Ene madame dans so *Hijâb* li libre pou communique avec bane dimounes et aussi pour faire so Dawa dans ene façon respectable. Nous *Hijâb* li aussi ene message à tous bane madames du monde ki nous pas opprimé couma zot penser. Nous *Hijâb*, nous *Pardah* c'est ene affirmation de nous liberté ki nous Rab (Allah) et nous Prophète, Hadhrat Muhammad (saw) fine donne nous. Nous bizin fière d'être musulmane et assume nous rôle en tant que telle. Faudé pas nous laisse bane dimounes ignorants enlève de nous nous liberté pou porte le voile.

Au contraire, sa bane mauvais incidents ki pé arrive à bane madames musulmanes de par le monde seulement à cause zot mette *Hijâb* bizin ene warning, ene signale pour tous bane madames musulmanes ki zot bizin conne assume le port de zot *Hijâb* et *Jilbâb*, et même bane madames ki pas porte le voile, mais ki zot bizin habille zot correctement et couvert zot avec zot linge avec décence et nous bizin maintenir lor nous droit au port du *Hijâb* parski ensam comme ene sel la force, c'est nous *Insha-Allah*, ki pou fer le monde prend conscience ki le *Hijâb* c'est l'habillement du paradis et nous paradis li trouve dans l'obéissance de Dieu kan Li fine dire nous pou couvert nous nudité et préserve nous pudeur.

Avant mo terminer mo mette devant zot ene extrait d'ene Khutba Jummah (23 Août 2013) du Khalifatullah Hazrat Munir Ahmad Azim (atba) lor le sujet de la pudeur et *Pardah*:

*« L'esprit de 'Pardah' englobe aussi bien la chasteté et l'honnêteté aussi. Ki ou ene z'homme ou ene femme, zot bizin préserve zot chasteté, zot modestie et inculquer sa à zot bane zenfants. En effet, sa grand qualité morale là li ene bouclier contre péché. En vérité le *Pardah* islamique c'est la pudeur(Haya). Si ou protège ou pudeur, bane anges d'Allah pou éloigne ou de tous sortes kalités mal et péché ki ena parski meilleur 'Pardah' li basé lors la pudeur et l'amour-propre. Si ou protège ou pudeur, ou sens de vivre en accord avec bane commandements d'Allah, alors Allah pou vine ou Protecteur contre bane tentations sataniques ki toujours là présents pour faire ou, corps et âme dévier de Allah.*

Mais kan il s'agi de vie ou de mort, alors faudé pas hésiter par pudeur. Le moindre hésitation pou transformer en la honte et sans pudeur. Dans tous bane la lois, ena bane exceptions ki Allah tout à fait comprend. Ici, le sens de la pudeur li totalement différent. Dans ene moment kot tous bane les autres z'hommes offert zot la vies couma en temps de guerre ou de Jihad, si kikaine choisir pou retire li de sa bataille ou Jihad là soi-disant par amour-propre, à ce moment-là sa dimoune là so conduite li pou ene conduite méprisable et rempli de la honte.

Donc bizin comprend le sens de l'amour-propre d'après bane circonstance. L'éducation de bane z'enfants bizin fer dans ene telle façon ki demain zot pas vine bane dimoune ki manque courage, ki gagne peur et ki bane lâches. A aucaine moment faudé pas zot recule devant zot bane responsabilités. Zot bizin être prêts pou participer pleinement pou répanne le bien autour de zot et engage zot dans bane tel activités pou promouvoir sa bien là. C'est ene défaut sa ki ene dimoune li hésiter pou prend part dans fer ene bon action. Donc, bane mamans bizin fer zot ene devoir pou inculquer le vrai sens de l'amour-propre à zot bane z'enfants : c'est-à-dire, ki sa bane zenfants là bizin être vraiment fière pou prend part dans ene bon action et ki li bizin senti li coupable, honteux et gagne ene dégoût pour kit mauvais action. De sa façon là, 'Pardah' pou établi par li-même. Li pou vini naturellement. »

Alors, ki Allah aide sakaine de nous pou conne assume nous rôle en tant ki musulmane, et en vérité ene de nous bane rôle, c'est ki nous bizin reste ferme lor le *Pardah* islamique et par nous l'exemple nous capave donne courage à bane les autres ki pé hésiter dans porte le voile, pou mette le voile dans ene façon convenable ki agréable à Allah et au norme islamique, prend dépi le début de la création jusqu'à la perfection de bane l'enseignements de l'Islam. *Insha-Allah.*